



Terenga 4: Hōtaka 7 - Ko te reo kia Māori

He Mihi

E te tānga o te reo, nau mai anō ki te hōtaka nei, ki Ako. Koinei te papakāinga e rangona ai te reo Māori, hei whakamaunga taringa; e kitea ai te reo Māori, hei whakamaunga kanohi.

Hei Mahi Whakarongo

Nā Ruia Aperahama te waiata i te mahi whakarongo i tito. Ko Maisey Rika te kaiwaiata. Hei tā ngā whakamārama a Maisey, he oriori tēnei hei whakatau i te pēpē i roto i te kōpū o tana whaea. I a koutou e whakarongo ana ki ngā kupu, whakaarohia ake ēnei pātai:

- 1) Ko ēhea wāhanga o te tinana i rangona?
- 2) He aha ētehi tohutohu i rangona?
- 3) He aha te tikanga o te kupu 'mā' i muri i te waewae me te ringa, ki ō whakaaro?

He Whakamārama

E rua ngā tauira ka tirohia e tātou i tēnei hōtaka hei whakatauiria i te Māori o te rere o te kōrero. Tuatahi, ko te takoto o te kupu '**tere**' me te kupu '**kaha**' i roto i te rerenga, mehemea e whakamahia ana hei whakamārama i te āhua o tētehi mahi.

Me oma **tere**! ✗
Kia tere te oma. ✓

Me haere **tere** mai! ✗
Kia tere te haere mai. / Haere mai. Kia tere! ✓

Me tū **kaha**. ✗
Kia kaha te tū. ✓

Me pupuri **kaha** ki taku ringa. ✗
Kia kaha te pupuri ki taku ringa. ✓

Tuarua, ko tētehi momo tohutohu e uru ai te tūmahī, te tūāhua rānei me te wāhanga o te tinana e hāngai ana:

E moe ō **karu**.
E kōpi tō **waha**.

E tū tō **wae**.
E tau tō **nono** ki raro.

E huri tō **kanohi**.
E awahi ō **ringa** ki tō hoa.

Hei Mahi

Whakamāorihia ngā rerenga e whai ake nei:

1. You should speak faster.
2. Pursue the language with vigour.
3. Reach out and touch somebody's hand.
4. Cast your gaze to the west.

Whakautu:

1. Me tere ake tō kōrero.
2. Kia kaha tō whai i te reo.
3. Toro atu tō ringa ki tō tētahi.
4. E hora ō mata ki te hauāuru. / E huri tō kanohi ki te hauāuru.